

# La navetta tegna il curs

Il 6 da schaner 1997 era vegnida publicada l'emprima ediziun da La Quotidiana. Malgrà ina u l'otra burasca è la «suletta gasetta dal di rumantscha» vegnida da tegnair la dira. Il giubileum da 25 onns è in mument per gratular e trair bilantscha.

DAVID TRUTTMANN/FMR

En in'intervista cun la Bündner Zeitung aveva ditg l'emprim schefredactor da La Quotidiana, *Enrico Kopatz*, ils 6 da schaner 1997: «Jau sun fitg segir che La Quotidiana na vegn betg a far naufragi.» Blers chapitanis rumantschs n'avessan betg sutscrit quella frasa quel di. E surtut n'avessan els betg sutscrit quai durant in u l'auter mument critic dals davos onns. E tutina pon ins dir ussa, suenter in quart tschientaner: Enrico Kopatz ha gì raschun. En in temp cun grondas midadas en il sectur da medias (digitalisaziun, perdita d'abunents tar tuttas gasettas, muria da gasettas) è La Quotidiana vegnida da tegnair la dira – u per discurren en terms da la nautica: Ella ha tegni ses curs.

## Suffels dal maun public

Da mantegnair la gasetta è però stà pussaivel be grazia a divers suffels era da vart dal maun public. Da l'antieriura redacziun (guarda fotografia da l'emprim frontispizi) èn ils blers collavuratur vegnids engaschads pass a pass da l'Agentura da novitads rumantscha (anr), finanziada dal maun public. Oz è perfin l'entira redacziun e produenziun da la gasetta mandatada a la Fundaziun Medias Rumantschas (FMR), la quala vegn alimentada da Confederaziun e Chantun e la quala furnescha cuntegns medials per tuttas gasettas rumantschas.

## Passagiers da differentas rivass

La Quotidiana n'è oz betg per forza ina nav che vul cuntanscher ports internaziunals, ma-

bain ina navetta che fa di per di sia lavur per «passagiers» fidaivels da differentas rivass. U cun ils plets dal schurnalist *Pieder Caminada*: «La Quotidiana è ina gasetta surregiunala cun differentas sut-gasettas localas.» Tranter il personal ch'ha manà la navetta è segir da menziunar spezialmain il chapitani il pli fidaivel, *Martin Cabalzar*. El è stà durant passa 20 onns schefredactor da La Quotidiana ed ha «tegnì ensemen la bartga», cun sustegn da divers collavuratur fidaivels, da «mariners» activs per part anc oz.

La finamira da basa da la «suletta gasetta dal di rumantscha» è però restada, da dar di per di vusch e pled al discurs ed a la vita rumantscha. Tgi che fa quai durant 25 onns, po esser satisfatg. Perquai: Ahoi!

**Pages 2–7**



FOTO SOMEDIA